



Jumat, 9 Juli 2021

Ogen: ESEKIEL 4:13-17



Bene Ukur



Kerina jelma ersura-sura ndatken situasi kegeluehen si erbahanca ia tenang ntaah pe seh ku zona nyaman. Zona nyaman e pe menyangkut ku bas situasi nggeluh si cukup, la kekurangan, la lit kebiaren, pendahin mejile, uang masuk simpapar. Zona nyaman e jadi perayaken melala jelma. Tapi zona nyaman e megati jadi dalan sirang ras Tuhan. Sabap kenca sialoken kerina si mehuli, pasu-pasu si simpapar bas Dibata nari siakap kin maka arah beluhta kerina maka lit. Bage me pengejapen bangsa Israel sedekah kerajaan Israel lit denga. Perban simpaparna pemere Dibata, sikapna kegeluhen i bas tanah Dibata e, lanai ingetna ise simerekenca kerina. Sedekah enda la pernah kurang nakan, kai atena ipanna banci ia milih sue ras peraturen Tuhan. Tapi ukurna bene man Tuhan. Maka kenca enggo nungtung cawan pernembah ate Tuhan, ibuangken me bangsa e man bangsa Babil. Esekiel nuduhkan nubuatan Tuhan, maka bangsa e nandangi kekurangan si man panganen. Terpaksa me ipanna pangan si selama enda ipantangken (ay.13) enda erkiteken iadep-adepen Dibata enggo lanai badia akapna bangsaNa e erkiteken penulakna man pedah Tuhan. Tapi perban labo kari ngasup bangsa e man pangan si la arus. Ikataken Tuhan ka maka ban benena ukur bangsa e, kotor lembu pe ibahanna jadi penggestungi pangan si man panganenna. Pangan pe kurang inemen pe kurang, Tuhan si erbahanca guna ningetken bangsa e. Sabap bangsa e enggo rate-ate ras la pernah ngataken bujur i bas masa kelimpahen si ibahan Dibata. Sengaja ibahan Dibata bangsa e ngenanami kesusahen, bene ukurna. Zona nyaman ras bene ukur situasi si tuhu-tuhu petembil. Tapi zona nyaman banci kalak ndabuh ku bas dosa, bene ukur banci kalak mulihken ku Tuhan. *Pagit langa tentu ertina racun, entebu labo pasti tambar.*